

ВЫИЛЬ ДАУР

12-тй
КОНЬЫВУОН
(12 октября)
2018-тй ар
№ 20 (10477)
6+

«Можгинские ВЕСТИ» газетлэн приложениез

• Адзем карымон

Мария МАМОНТОВА, туспуктйз автор

Вожвыльясъкисы песянайёс

29-тй куарусёна «Октябрь» культура юртын карысьтымы но ёросысьтымы 12 чырткем песянайёс «Этно-бабушка – 2018» вожвыльясъконэ пыриськисы. Соос удмурт, эуч, бигер, пор но чуваш калыклэсь лулчеберетсэс возматйзы.



Сям-Какся гуртысь Зинаида Александровна Тарасова ёрилэн ёзчиосыныз А. С. Мерзляковен но П. В. Кайшевен

Вожвыльясъкон куинь час пала кыстйськис. Нырысь ик песянайёс сцена вылысен асёнызы тодматйзы. Конкурсэ пыриськисёслы нылпиоссы но нунокёссы юрттйзы. Удмурт калыклэсь сям-йылольёсэс возматйны вить усточиос тыршизы. Котькудйз соос пёлысь дуньясьёсыз ас сяменыз паймытйз, виль паласен ассэ усътйз. **Г. М. Алешкиналы «Песянай-визьлюк» ним сётйзы.** Галина Михайловна Можгайсь история но шаертондоя музейн ужа. Вожвыльясъконын со туж быгатыса арганэн шудйз, удмурт эктонэз быдэстйз, кылбурез пыр вордйськем шаереныз даньяськемзэ вераз:

*«Кинлы ке но кельшо жужытэсь гурезьёс.
Кинлы ке – чагырьсь но муресь зарезьёс.
Лымшорысь пальмалы одйгез синмаське,
Мукетыз городын улыны малпаське.
Мон ноку но уг вошты пичи шаерме,
Верало со сярысь яратон мылкыдме.
Туж дуно мон понна атыкай юртъере,
Татысь ик потйз вань чыжы-выжые».*

Чешошур-Учаысь Е. Н. Кутузова но «Песянай-визьлюк» нимын пусъемын. 56 аресказ кышномурт туж чебер но егит адске. Со фермаын скал кыскись луыса ужа. Кузпалёныз ныйль нылпи будэтйллям, али куинь нунокёссы шумпотто. Елена Николаевналэн арганэн шудыны дышетскемез, пе, потэ. Ваньмон дыръяз кияз крезьгуро инструментсэ кутэ но сюлмысьтыз ик кыска. *«Шудоен мон асме лыдьясько, тйледлы но шудбур сйзисько»*, – шуэ Елена Николаевна.

Вылын Юриысь О. М. Русина «Тужгес но быгатйсь песянай» ним басътйз. Ольга Михайловна дуньясьёсты пужыятэм но керттэм кижъёсыныз паймытйз. Со школаын ужа, покчи классёсы ветлйсь пинальёсты дышетэ.

Нош Сям-Какся гуртысь З. А. Тарасова кырзаны-вераны быгатэмзэ шараяз. Зинаида Александровна клубысьтызы «Инвожо» ансамбле ветлэ, пёртэм сценкаосын шудэ. Дуньясьёс солы «Тужгес но йёно песянай» ним сётйзы.

Сыче нимын ик **Быдзымсурдысь Г. М. Токарева** но пусъемын. Галина Михайловна гуртазы ик соцпедагог луыса ужа. Кузпалыз Алексей Александрович – усто баянист. Токаревъёс куинь пиос будэтйллям. *«Анаймы котьку индылэ вал: нылпиосты вордскизы ке, песяйёсты доры кемалы эн келлялэ, асьтэос утялтэ. Нош али пимес куное вайиськом но, анаймылэн соин люкиськемез ик уг поты. Эшшо мед куноялоз ай, шуэ»*, – вера Сергей пизы.

Песянайёс вожвыльясъконэ рос-прос да-сяськиллям. Сцена вылэ соос йёскалык дйсен потйзы. Нош конкурсэ ваем пыжиськемъёсынызы вань люкаськемъёс кунояськисы. Мар но уг быгато та чырткем песянайёс: кижужен выро, сад-бакча мертто, ческыт пёрасько, кырзало-экто, нунокёсэс визьнодало. Ужрад пумын конкурсэ пыриськисёс синпель кузьымъёсын но дипломъёсын пусъемын вал. Вожвыльясъкон огшокчемен кадъ ортчиз, вань люкаськемъёс эч мылкыдын кошкисы.



Чешошур-Учаысь Елена Николаевна Кутузова кижужен вырыны яратэ

Жильыртйсь чуръёс

Удмурт Элькунысь йёскалык лыдзетьюрт «Можгалэн жильыртйсь чуръёсыз» вожвыльясъкон ортчытэ. Со пинальёслэсь лыдзиськыны мылкыдзэс жутон понна радъямын. Дышетскисёслы Можга ёросысь кылбурчиослэсь чуръёсэс вольыт лыдэно луоз.

Элькунысьтымы котькуд ёросын чешатсконлэн нырысетй быръён вакытэз ортчиз ини. Нырысетй этапе Можга ёросысь пинальёс но пыриськисы. Ваньмыз чеш 16 удмурт но эуч кылын гожтэм видеоадзытонъёс люкаськисы. Дуньясьёс шумпотыса пусйизы, ёросамы кылбуръёсты чебер но вольыт лыдзыны быгатйсь пинальёсмы ёжыт ёвл шуыса. Тужгес умой лыдзисьёслэн – Вылын Юриысь Коля Павловлэн, Быдзымсурдысь София Соколовалэн но Можга черкогурт школысь Максим Бакулинлэн – видеоужёссы йёскалык библиотекае ыстэмын ини. Табере пинальёс Ижкарын вожвыльясъкозы. Оскиськом, соослэн ваньмыз пёрмоз.

Елена САПОЖНИКОВА

14-тй КОНЬЫВУОНЭ 16 часын «ДУБИТЕЛЬ» КУПЬТУРА ЮРТЫН

Удмурт Элькунысь калык артистлэн,
Кузёбай Герд нимо премилэн лауреатэзлэн

**ГЕННАДИЙ БЕКМАНОВПЭН –
ЮБИПЕЙ ЖЫТЭЗ.**

Пырисько:
Наталья Буранова,
Вероника Романова
но мукет артистёс.



16+

Юанъёсыя жингыртэ 4-17-58 телефонъя.

«Пичи шоу» ётчаське

«Мынам Удмуртие» телеканал туэ нош ик «Пичи шоу» проектэ азыланьтэ. Та ужрад нырысь ик ёросъёсысь нылпи садъёсы ветлйсь усточиосты шараяны, быдэс элькунмылы быгатонлыкъёсэс возматйны луонлык сётэ. Со чешатскон выллем радъямын. Кылем арын вожвыльясъконэ Можга карысь куинь нылпи садъёс пыриськисы, удмурт кырзанъёс улсын эктйзы.

Таяз проекттын покчиослэсь быгатонлыкъёсэс паськытгес эскерыны малпамын: эктэм сяна, туэ соос удмурт но эуч кылын кырзамзэс, чебер вераськемзэс но крезьгуро инструментъёсын шудэмзэс возматозы. Отчы куиньысен 12 аресозь пинальёс пыриськыны быгатозы. Мылкыд карисьёслы «ВКонтакте» вотэсбамысь «Шудон коркалэн» группаез пыр анкетаосты шедьтоно но 31-тй коньявуонозь pichioli@yandex.ru электрон почтае ыстоно.

Озыен, азылань, можгаос! «Мынам Удмуртие» телеканал вите усточиосты!

Ольга ФАРХУТДИНОВА